



Taoba South Korea tir Yoon
küm 5 tepuokdak ayutsü

India tsür Manisha Kalyan
lianza Lima Femenino nung denogo



Nagaland Upa-Lokayukta atema G.H. Ramlia shim



Chief Secretary, Sentiyanger Imchen, IAS, Home Commissioner Abijit Sinha, IAS, Lokayukta, Nino Iralu aser Upa-Lokayukta Khanrila T. Koza nung Upa-Lokayukta G.H Ramlia den külemi agiba noksa ka angur.

Dimapur, January 16, 2026 (TYO): Nagaland nung taoba State Information Commissioner aser Retired District & Sessions Judge, G. H. Ramlia-i Upa-Lokayukta inyaker. January 16, 2026 nü Secretariat Conference Hall,

Nagaland Civil Secretariat nung Chief Secretary, Sentiyanger Imchen, IAS-i Ramlia nem tezüngzüktep agidaktsüogio. Iba sentong ya Home Commissioner, Abhijit Sinha, IAS lenisüba kübok agi aser sorkar tongti ketdangsür aika aden.

Congress-i Assam election atema senden amen

Guwahati, January 16, 2026 (Agencies): Congress-i January 16, 2026 nü Assam Assembly elections atema kanga dang tongtipang senden ka menogo. Iba senden ya Congress president Mallikarjun Kharge'er kidang amen aser Rahul Gandhi aden. Senden nungsa AICC general secretary (Organisation) K C Venugopal, Assam Congress president Gaurav Gogoi, aser AICC general secretary in-charge of Assam Jitendra Singh nung denogo. Maneni, Congress senior observers Bhupesh Baghel taoba Chhattisgarh chief minister aser D K Shivakumar, Karnataka

deputy chief minister naprong iba senden nung aden. Iba senden nung Congress maparen renemba, election atema asalentong, observers aser state unit tsüngda amalitep aser Assam nung sorkar akümtsü atema party-i inyaksüba önüktem benoka lemsatep. Züngsem 126 agi akümba Assam Assembly indang election ita ishika tsüngda agitsü. Kerala, Tamil Nadu, Puducherry aser West Bengal den külemi taküm election agitsü. Congress-i Assam nung ruling BJP den kanga meranga tokteptsü atema nükjidong lir aser election matongdang maparen balala inyaka arudar.

PM Modi-i Assam semdangtsü

Guwahati, January 16, 2026 (Agencies): Prime Minister Narendra Modi-i January 17 aser 18 anogotem West Bengal aser Assam semdangtsü aser idangji rail aser infrastructure projects sayatsütsü. PM Modi-isa India nung mezüngbuba Vande Bharat Sleeper train service tenzüksütsü aser iba ya Howrah aser Guwahati tsüngda lir. PM Modi-i January 17 anüngdang Malda, West Bengal atongtsü aser Malda Town Railway Station nungi Howrah-Guwahati (Kamakhya) Vande Bharat Sleeper Train tenzüksütsü. Iba overnight service tasen ya Vande Bharat series ulushiba nung tongti alizüng ka asütsü. Iba sentong agiba sülen Prime Minister-i Malda nung public sentong ka nung Rs 3,250 crore shi endoka rail aser road

infrastructure projects inyaksü atema lung azünga yutsütsü. January 18 nü PM Modi Hooghly district kübok Singur-i aotsü aser idakji Rs 830 crore shi alang terenlok mapatong aika sayatsü. West Bengal aser Assam nung taküm Assembly elections agitsü lir aser PM Modi-i state anaprong nung Amrit Bharat Express trains aser additional LHB-coach services tenzüksütsü. Assam nung Modi-i Sarusajai Stadium, Guwahati nung Bodo nung sobaliba yartsüngsangba sentong ka nung adentsü. Iba sentong nung artistes 10,000 shi adentsü imlar. Paisa Rs 6,957-crore Kaziranga elevated corridor project atema bhoomi puja nung adentsü aser video conference ajanga Amrit Bharat Express services tenzüksütsü.

NUCF & Town Councils, WSH nungeri Dimapur airport atema rongshir

Dimapur, January 16, 2026 (TYO): Assam Rifles Training Centre (ARTC) ajanga Airport Authority of India (AAI) ali atsünga agiba aitsür ta Nagaland Urban Council Federation (NUCF) den Town Councils 36 pronglai metetdaktsüogio. Dimapur Airport ulushitsü atema ARTC tanga belentsüla ta parnoki sangdong ka nung ashi. Iba ali kibur ya AAI lir anungji ARTC ozüng alema ali atsünga agia lir. Iba atema shidi balala zülüaka aser training centre belentsü mepishiaka hao ta mali yutsüba atema mepelar ta NUCF aser Town Council temi ashi. "ARTC belena maoba ajanga Dimapur Airport ulushia tajungba küma yanglutsüba nung tetsükdaktsü ajurur. Nagaland nung civil airport ka dang alibaji Dimapur Airport lir saka renloka maoba ajanga air connectivity nung timtem ajurur, rongsenketzüng mainer, rongdak mapang mapa shitak meinyaktettsüsa tia ka nung aser Nagaland nung tourism & investment indang maongkatem magiteter" ta parnoki ashi.

Urban local bodies yagi nübortem aginüba ola adoker aser nisung ajaki public infrastructure atema lemozüksüba ali ya timi amshitsüla ta temulungtetba lir. Anungji ARTC-i AAI ali toktsütsüla aser iba ya Ministry of Home Affairs aser Ministry of Civil Aviation ajanga mapang atakzüker inyakdaktsütsüla ta NUCF aser 36 Town Councils-isa metetdaktsüogio. ARTC-i AAI ket nung ali meyipa magütsüra ibaji public taginüba aser terenlok anema ta züngshitsü aser onoki ozüngi melaba ama inyaka aotsü ta NUCF aser Town Council temisa ashi. Külen, Western Sümi Hoho-ia tanga sangdong ka ajanga Dimapur Airport ali atsünga agiba magizükba metetdaktsüogio. ARTC-i mapang talangka iba ali atsünga agiba ajanga Nagaland renloka aotsüba nung timtem tulu agütsür ta parnoki ashi. Küm aika tejakdang Dimapur airfield ali ya civil aviation ketdangpur ket nung agütsü aser ibaji AAI ketdangsübaren kübok

lir. Ajisüaka ARTC-i iba ali toktsür aotsü memulungi noktakba nung temeten kecha mali aser iba ya public taginüba anema lir ta WSH-isa metetdaktsüogio. Dimapur Airport ya kanga dang tongtipang infrastructure ka aser Nagaland renloka aotsü atema tongti lir. Ajisüaka tuluba aser tajungba küma meyanglutetba ajanga air connectivity mesademer, tourism aser investment lenmangtem shibanger aser Nagaland nung alir nem modernization temeten magütsür, ta parnokisa ashi. Iba ali melena ARTC nem tanga ali agütsüogio anungji Assam Rifles-i linük kümzüka ayur ka ama tenangzüktep agia alibatem akhümtsübuttsüla aser AAI ket nung ali meyipa agütsütsüla ta Western Sümi Hoho-i shiogo. Nagaland nung alirtemi mapang talangka ataogo aser joko atsülanga aotsü memulunger. Anungji bangdakpur ajaki mapa inyaka tekaratiba nung airport ali meyipa agütsütsü ayongzüker ta WSH-isa metetdaktsüogio.

SDPDB Bhandari-i Foothill Road tekaraba nung yanglutsü nenshi

Dimapur, January 16, 2026 (TYO): SDPDB Bhandari senden amendang bangdak department dang Nagaland Foothill Road Construction mapang shitak nung tembanga inyaksü atema shiogo. Senden nung SDO (R&B) PWD Er. Elithung Ovung-i January 17 nü department-i mapa

inyakba reprangdanga senzütsü aser iba sülen January 21 nü Lotha Hoho Foothill Construction Committee aser Department ketdangsürtem külemi joint inspection asütsü osang lemsatepa liasü. Iba senden nung Additional Deputy Commissioner & Vice Chairman, SDPDB Bhandari,

Longasen Lotha-i ketdangsür tasentem pelashishia agizük aser taoba senden önüktem meyipa reprangshia liasü. EAC Bhandari, Kilangtemsu-i Bhandari nung officers' club tentettsüba indang tebilemba lemsatep aser Republic Day 2026 benjung atema departmet balala nem mapa lemozüksü.

Assam Rifles-i Thilixu kitsükkirong lendong nung yaritep



Dimapur, January 16, 2026 (TYO): January 16, 2026 nü Chümoukedima district kübok Thilixu Village nung kitsükkirong lendong ka ataloka liasü. Ajisüaka, iba tesem nung aliba Assam Rifles sepaitemi mapang shitak nung yimdaklirtem den yaritepba ajanga lendong tulu küma

moudaktsüi noktangogo. Lendong atalokba osang angashili Assam Rifles sepaitemi tesem tonga oa yimdaklirtem den yaritepa inyak. Mapang shitak nung inyakba ajanga mi tulu ka jangrua moudaktsüi noktangteta liasü. Iba mapa ajanga Assam Rifles-i rongdak mapang humanitarian

assistance aser disaster response tenangzüka aliba sayur. Iba ajanga Assam Rifles ya security agütsür ka dang masü saka nüngdakba mapang first responder ka lir ta sayuogo. Yimdaklirtemia Assam Rifles dang mapang shitak nung yaritepba atema pelaba metetdaktsüogio.

CM-i Shamator nung DC office tasenba semzüksü



Dimapur, Aenjeti/January 16 (TYO): Yimchungru kin Tsungkamnyo Mini Hornbill benjung amungba den denchitepa Nagaland Chief Minister, Dr. Neiphiu Rio-i January 16 nü Shamator nung DC office Complex tasenba semzüksüogo.

Paisa, DC office den Superintendent of Police, DPRO office, DYRO office, DPO (Planning) office aser District Sericulture Office semzüksüogo.

Nüburtem tali tajungba tenzüksü aser District Administration institutional framework tashi itshidaksütsü atema item office tem semzüksüogo.

Office semzüksüba sentong nung o jembiba mapang Chief Minister-i, departmental engineer, contractor, mapa inyakterem aser iba tesem nung alirtem dang parnoki bendanga agüaja teka amteper inyaba den inyakyim nongita yariba atema tenüngsang agütsü, aser iba ajanga iba mapa

ya District nung aliba nüburtem atema asangsang kümdaksüogo, ta ashi.

Dr. Rio-isa, Shamator ya Nagaland nung tawa tentetba district tem rongnung ka lir aser iba district nung terenlok balala bener arutsütsü aser administration ya nüburtem dangi anasatiba bener arutsütsü nükjidong nung amenok ta ashi.

Ajisüaka Deputy Commissioner indang office ka makaba ajanga ketdangsüba, department tem tsüngda tesendaktep, public service balala agütsüba aser sorkar scheme tem benoka inyakba nung tetsükdaksü ajangshia aruogo, ta pai ashi.

Tang item office tem semzüksüba sülen tawa aliba ajak süngdaksütsü, aser District Administration kanga junga inyaksangshitsü asoshi tamendakdaka akangshitsütsü ta Rio-isa shimsem.

Deputy Commissioner ya District jenjang nung principal administrative aser Executive

authority lir aser revenue, administration, temzüng özüng achaayangtsü, disaster management, terenlok maparen, line Department tem yongtsüng nung sentong yanglutsü aser apulatsütsüji DC khuret lir ta shia Rio-i ashiba agi, District nung iba office amenokba ya ketdangsüba akangshitsü, service balala tajungba agütsütsü aser lenla ajak nung nüburtem ajangzüksükdaksütsü asoshi kanga tongtibang lir. Rio-isa, Treasury and Sub Treasury Office ya senotsü tsütateptsü nüngdak apir amenoktsü ta shisem.

Maneni CM-i, Shamator District nung aliba nüburtem dang iba facility pei meyong ama anepalutsü aser takokba tashi amshitsü ajungshia liasü.

Rio-isa, nüburtem den Tsungkamnyo benjung salem lemsatep aser office Complex tasenba semzüksüba sülen Shamator District putu tasen kati ayaoka ia terenlok nung aotsü imlaja ataba lemsatep.

Niuland nung RD atema senden menogo

Dimapur, Aenjeti/January 16 (TYO): Additional Deputy Commissioner (ADC) Niuland, Atsangla lenisüba nung January 16 nü Niuland DC Conference Hall nung taruba Republic Day anogomung atema coordination senden ka menogo.

Republic Day anogomung atema department balala nem

mapa lemtsüba mapang ADC-isa, züngsemtem dang January 23 nü anepdang 6 ako nungi tenzüksü lokti merekmeju sentong ka ayongzüksü agitsü ta metetdaksü.

Iba dak sendakba nung ADC-i züngsem ajak dang iba merekmeju sentong nung jangrabangra shilem agitsü mepeshia metetdaksüogo.

Tizit nung coordination senden amen

Dimapur, Anejeti/January 16 (TYO): Taruba Republic Day anogomung atema January 16 nü Tizit ADC conference hall nung coordination senden ka menogo.

Senden nung Republic Day anogomung atema mapa balala department aser riju balala nem lemsüka liasü.

SDO (Civil), Tumben P

Tsanglao, shiba lenisüba nung iba senden mena liasü, pai ken o dak sendaka alir ajak dang pei nem lemsüksüba mapa nendak inyaka Republic Day ya takok ngua amungtsü mepeshia metetdaksüogo.

Office tekolaktem, shisaluyim rijutem, lokti lenirtem, NGO tem, kiyong balala Chairmen aser CB temi iba senden nung shilem agia liasü.

Niuland DPDB-i 2026 küm ya süntong atemba küm ta sangdongogo



Dimapur, Aenjeti/January 16 (TYO): Niuland District Planning & Development Board (DPDB) senden January 16 nü DC Conference Hall Niuland nung menogo.

Deputy Commissioner aser DPDB Niuland Vice Chairman Sara S Jamir lenisüba nung iba senden amen, aser lai 2026 küm ya süntong atema küm asütsü ta sangdongba den, ken o dak sendaka aliba department ketdangsür dang iba sentong ya takok ngua benoka inyaksü asoshi renemtsü mepeshia metetdaksü.

DC-isa, district takoktem aser district nung tang benoka inyaka aliba mapatem lepa reprangshi aser officer ajak dang 2026 küm atema pei department inyakyim yanglua

metetdaksütsü mepeshia liasü. Senden nung District Fisheries Officer (DFO), Fisheries Department, Dr, Amenla-i, taoba küm asem tashi nung Department-i district nung terenlok maparen balala benoka inyakba indang osang tejangja agütsü.

Iba dak sendakba nung DC-i, district nung ango metsüa ayoktsü asoshi lenmang sadema lapoka lir ta shia, department dang district rongsenketzüng ajungkettsütsü asoshi shishilembatsü atema tasa balala bushiyonga aotsü ayongzük. Maneni DC-i department dang ango farm ka asoshi proposal ka benoktsü aser district nung ango benjung ka ayongzüksü amungtsü shidanga liasü.

Abiogenesis-i ken tasen ka sayaogo



Dimapur, Aenjeti/January 16 (TYO): Dimapur nungi Indian Naga folk fusion kentenba telok Abiogenesis puri "Let's Spend Our Lives Together" ta nüngja agütsür ken tasen ka sayaogo. Iba ken ya January 16 nü nungi alima ajunga nung tongtibang sabang ajak nung angutsü.

Iba ken ya Muzartdisco-i distribute asü. Muzartdisco ya independent music ecosystem

melenshitsütsü nükjidong nung Radio City aser Beatchain nati amenokba sabang ka lir.

"Let's Spend Our Lives Together" ken ya taküm otsü ken ka lir, koba Arenla aser Moa Subong nati lanuwa tena aniasüngtepba mapang züluba lir. Tena jurla, professional aser kentenba wadang nung shilem balala agia aruba ajanga iba ken ya küm aika memangaok aser mesayi

liasü.

Mapang talang ka lir tenati studio-i aotsü telemtetba agi aser iba ken ya 2025 küm November ita mangaok aser kuma aika ataba sülen alima matsüngda sayaogo.

Mezüng züluba ama dang ken ojanga ka danga memelenshi iba ken ya mangaoktsü asoshi parnoki telemtetba agi, koba ajanga lanuwa koda ochi aser tongmelang liasü aji sayur.

Kasa mapang nung parnoki kensüa memelenshi mezüng mejemba ama dang tenogo, aser ibayongji ken ya Abiogenesis pur indang signature Howeymusic genre den balaka lir.

"Let's Spend Our Lives Together" ken ya lyrics ajungba den bamhum aser guitar amala kongki balala agi kanga tebur jungdakja mangaokogo. Official Music video ya yakta Youtube nung sayatsü.

Spotify nung iba link :-

<https://open.spotify.com/album/2KScMTcFiC4LD0eXMQfzwJ?si=ebeyLV8ZSmeRBULmrn64> ajanga iba ken angatetsü.

S. Phangnon Konyak-i Mimkut benjung salem lemsatep

Dimapur, Aenjeti/January 16 (TYO): Nagaland nungi Member of Parliament, Rajya Sabha S. Phangnon Konyak-i Mimkut benjung amungba mapang Kuki nunger adianutem den benjung salem lemsatepogo.

Mimkut benjung ya alu aroba sülen amungba benjung ka lir ta shia MP-i, iba benjung amungba ajanga

telongjem tali adokdaksütsü aser ajak sasümnema alitsü imlatsüba den Kuki nunger takar sobaliba maneni wazüksü ayutsü aser ajungkettsü imlaja ataba lemsatep.

Laisa, yimjiyimjung aser tepela nung benjung amungtsü imlatsüba den ajak madak Tsüngrem temaotsü asoshi sarasademja ataba lemsatep.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 17, 2026

Mapaji asen ayak

Tang tashi nung agia aruba AKM inti mungdangtem nung lenirtemi kanga temulung agüja kaketshir aser lanurtem dang len sayutsü merangbaji mapa inyaker kaka kümdaktsünüba ya lir aser, atangji, nisung shia, tazünger-mazünger ta mali ajak mapa inyaker kaka akümtsüla. Nisung ajaki kasa mapa meinyaktetsü, anungji nisung shiai kechi mapa jangrar aser kechi inyaktetsü ? Aser tangar asoshi kechi nungdaker (?) ta bilema inyaktsübaji kanga nungdaker. Aji oda, nisung ka alima nung ali langa alitsübaji pei tsüraburi jatsüba tenüng agi masü mesüra asenok azüngba degree agia masü saka asenoki inyakba mapa agi dang tangari asenok metettsü, anungji aseni inyakba mapaji pei ayak, pei identity, akümer. Aji angatettsü atema, tatishitsü agi, nisung ka tenüng agi Toshiba engineer aküm nung, joko paji Toshiba masü saka Engineer-ba akümer, kasaji Sübongba pastor aküm nung, paji joko Subongba masü saka pastor-ba akümer, ano kasaji Nüngsangbai dokan ka lapok nung paji Nüngsangba masü saka dokan kibur akümer. Ibaji meteta asenoki asenoksasa "ni kechi inyaker ?" ta asüba nung kanga süoki ia bilemtsüla. Tanü asenok tamakok kaji, asenok aika mapa mangu mesüra mapa maka, kecha meinyak kazüteper, anungji asenok tenüngjia tangari memeteti samaa aoer. Aji oda, tangari asenok dang "Na kechi inyaker ?" ta asüngdang dang aseni asen kechi inyakar memetet tamataritsüsa kümra, asenokji alima nung malir amai bilemtsüla, kechiyong alima nungbo mapa ka mesüra kabosa inyaka alitsüla. Tanü asenoki asen taküm aser asen lokti tia ya bilemdangra, asenok tebilemtsü ya , shitakba nungbo, yimten tebilemtsü masü saka asenoki asenoksasa mapa nguteta meinyaktetba tebilemtsü lir, kechiyong asenoki aseni inyaktsüba mapa ya tangar kari asen tonga bener arua agütsütsü amai bilemer. Ibayongji, tazüngertemia azüngtsüba kisungji pei mapa saka zünger mapa inyaktsübajibo tangari agütsütsü amai bilemer, anungji tazüngbo kanga meranga azünger saka zünger kechi inyaktsü ta asüba nung shisabolua mebilemdanger. Iba ama tangatetba mashilen bener alibaji shitaklen kümdakja angatetdaksütsü asoshi taoba mapang dang masü saka ano tanga AKM inti mungdang nung lanurtem dang mapa inyak sayutsüba nung temulung tali agütsütsü lemteter senshiogo. Atangji, aji kanga nungdakba mapa ka lir, anungji kanga temulung agüja inyaktsüla. Ajisüaka, Aotsür Aor lanurtem asoshi tekümdangtsü aser tangatettsü kaji, mapa inyaktsüba ya tangari sayu atatsüba mapa ka masü saka peisasa angazüka inyaktsü mulungtettsüla. Aji oda, mapa inyak angazüktsüba ya "training center" ka nung oa angazüktsübaji dang masü saka peisasa pei alidak angazüktsüba mapa aika lir. Item mapatem rongnung aluyimba mapatem, shiruru metsüba mapatem, chiyongtsü yangluba aser ayokba aser teka mapatem zünger mezüngma lir. Ano, mapa angazükdak tajungtibaji tangar mapa inyakdak par kübok inyaker kümer inyakbajisa tajungba lir. Aji oda, asenoki asen lima nungi tzümartem ajak meindoker asenoki parnok melen a inyaktsüla ta bilemer aser jembir, aji shitak kechiyong asen lima nung asenok mapa maka kazüteper saka parnokbo anogo shia mapa inyakaa sen aar. Ajisüaka, asenoki ajungbenaka parnokji asen lima nungi meindoker parnok melen asenoki parnok amenba dokanji mementettsü, kechiyong asenoki oset tenüngtemjia memetettsü aser osettemji kong nungi komaka bener aruar ajia mejangjatsü. Aji dang masü saka dokan nung osettsütem koma ayur aser koma ayoker aser teyokzükba senji koma amshir ta asüba inyakyimtemjia memetettsü, anungji asenoki tzümartemi inyaka aliba mapa melenzüka inyaktsübaji, ita sen tila süaka, aji agia asenokji par kübok inyaker kümer par den külemi mapa angazüka küm anasemka inyaktsübaji kanga nungdaker. Aji oda, asenok tzümar dokan ka nung 'Sales man aser Sales Girl' akümbaji ita senji masü saka asenok par nungi mapa inyak angazüker amato bilema inyaktsüla. Idangji dang asenoki mapa inyak metettsü aser asenoki parnok melen a inyaktettsü aser asen mapa agi tangari asena metettsü.

OLEMSABANG

Ao kin temenen bushia temulung meyiptsü mapang kati menepogo

L. Kika Pongener.

(Yashi adok nungi...)

Aotsür Aor tamanger tajungtem, Yerimia ainkar-i Israel kin asoshi mangyima ajepbaji tanü asen Ao kin asoshi ajepba kanga putepa lir. Asen senmang asenoki sayua aniteter kintem nem agütsüogo; asen kidang kilia yintetertem nem agütsüogo; aser tang parnok lenisuba nung asenok anidaktsüsa jenjang ka kümogo. Asen adianu anutoklen alir kin asen Aor kidang lia school azüngertem karbo Minister & MLA, Commissioner, Secretary, Director menden tashi nung mener; meyper asenok-ang parnok küpok alitsüsa tensa mapang ka bentsür aruogo. Aji oda, parnok jenjang tajung akümba agi mokokachia nukmeremba olen jembir masü; saka tanü asen Aotsür Aor jenjang asadanga; asenok khien atsüngakanga asentenshitsü ajungshirba dang. Asenoki kanga junga meshisadanger dang ashi, asen Aotsür Aor jenjang ya kangasa tesuleni atsüngzüka luadokogo. Asenoki asen Ao lima nung tesuiba mapang tatalokbatem khien meyipa reprangdangra, asen Aotsür Aor dak mamatettsüsa lendong tulu aiben dang atalokogo. Ashiko, item lendong-to Tsüngremi asenok dak tenarong mesukba asütsüa shibai metet. Küm ishika sua ogo; Mokokchung town nung linuk tenzüker o Indian army na tsüngda khatepdang; Indian army-i Dokan nung mi senokja tai maketba nisung ki telung nung shibanger rongsetba, karbo injang agi khasetba, ojalatem, oyalatem aser jalatem kar dakbo yimdong nung jakdak-jakdaka maksu benshiba; iba ama tansutsü mapa aika atalokogo. Ano anentsüh agi anembanga nisung taküm samaba; aser Tuli town nunga yipro-mopung tesashi aser tzümettsü agi ki-o-jen aika raksaja lendong tulu atalokba denjia aruogo. Aji oda, item tatalokbatem ajakji shisadangra, Tsüngremi Israel kin merenshiba ama asen Ao kin merenshiba sudi ta bilemer. Ajiser, tang asen Aotsür Aor kechi jenjang nung lir (?) Ao kin Naga nung madak lennir asüba kin-to; tanübo tema sorkar aser telung sorkar ajunga nung tangar sulen anitaker kin ka kümogo. Asen Ao kin kolak nungi korang semzüker tangar kin nem semoktsüogo. Jokorla, Naga nung kin ajaki asen Aor dang akümtsübuttsü melena tamaket-ang adentsüsa tensa mapang ka aruogo. Anungji asenok temenen nungi temulung meyipa Tsüngrem bushia küküa lumia temenen menanzükra; ashiko Tsün gremi asenok dang tai matoktsü sudi.

Aotsür Aor tamanger tajungtem....Naga nung rongnung mezüng Khristan yimsu agizüker kin; Naga nung kin teimba ka nuji kümdakja tenuk lapoktsür kin; küm noklang ka ser tenem tema amanga arur tamang-tir kin....Tanü Aotsür Aor tamang jenjang kong lir....??? Ao kin dang Tsüngremi pelatsü asü mepelatsü amai bilemer....??? Asenok ajaki ibaji khien arok-aroka shisadangdi. Naga nung kin shinga-ia yi bottle bendener atakatema jakreper rongdokba otsü mali; saka Aotsür Aor-i yi bottle atakadema jakreper rongdok. Ajisuaka, yi ajemer aser yi ayoker Aotsür Aor teimba. Ao lima kinuk-kisang ajak nung yi taluposa ayoker. Revival milak Ao lima nungi tenzüker, aser Naga lima sunga ayimsunga ao; saka tang Aor tamang jenjang kong lir....??? Asen Aor-i sayua aniteter kintem 'Mungdang' kecha nunga tanü tashi rongsen ketdangsuba nung ashishitepba otsü mali....!!!!??? Tangar kintem arogo kecha nunga arogo senpong nungi sen temong maka samaba otsü mali....!!!!??? Tangar kintem tenla kidang tenla sen tesarudak nung odi-odia teka amuoker amoutetba otsü mali....!!!!??? Tangar kintem tenla kidang mi senoktsüba tatalokba otsü mali....!!!!??? Election shia Aor aliba yimtsüng/town ajak nung sen yong vote ayoker, polling station coup asür, proxy vote agütsür, nisung teshimtet kari dang yimer / nubur ajunga meyong vote ajener....Election mapang nisung tepseta azü tokshiba, raratepa züktepba, lung agi ontepba aser tashiyim mapa tamajung tapu-tapu ajak Ao lima nung inyaker. Anungji item temenentem ya miimbanga meyui küküa lumia menanzükra; Tsüngremi Ao kin dang tai matoktsü sudi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Khristmas mapang Khristanem amakba anema longkak ait



Khristmas mapang India tesem balala nung Khristanem amakba anema January 12, 2026 nü Tamil Nadu kübok Egmöre nung aliba Rajarathnam nung Church of South India Diocese of Madras-i ayongzüka Khristantemi longkak aitba noksa nung angur.

January 16, 2026: Tawa Khristmas mapang India tesem balala nung Khristanem anema inyakba atema January 12, 2026 nü South India Diocese of Madras-i Tamil Nadu kübok Egmöre nung aliba Rajarathnam Stadium nung sentong ka ayongzüka longkak aitogo; iba sentong nung Khristanem aikati shilem agi. Madras nung Bishop Rev. Paul Francis Ravichandran leniba nung agiba sentong nungji Khristan denomination balala nungi putirtem, Khristan lenirtem aser Khristantemi shilem agi. Iba sentong nungji Catholic Church, Evangelical Church of India, Pentecostal churches aser Arcot Lutheran Church nungi aikati shilem agi. Longkak aitba sentong nung jembidang Church of South India nung General Secretary aser World Council of Churches, Geneva nung Central Committee züngsem, C Fernandas Rathina Raja-i Khristmas mapang Khristanem anema inyakba sashia aitsü. Paisa India temzüng kübok senso ajak nem temeden kasa agüja aliba aser Indian Penal Code kübok temerenshi balala metetdaksüba den külemi nütsüng ajema alirtem kümzüksü atema inyaktsüji ketdangsertem teinyaktsü shilem lir, ta ashi. Paisa, yimsü balala amangertem aika aliba India ama linük ka nung benjung balala akhümtsübutsüla, ta ashi. "Item temeden ya asen linük secular democratic tamendakdak lir. Yimsü nung ajemdaker amokmerenba, ola nembangtsütsü merangba mesüra bendanga züngshibaji linük temzüng kübok temeden balala anema lir," ta C Fernandas Rathina Raja-i ashi. Iba sentong nung Madurai-Ramnad Diocese nung putir,

Rev. Dr Jaisingh Prince Prabhakaran den Synod department directors, staff aser Tamil Nadu kübok tesem balala nung aliba CSI dioceses nungi züngsemtema aden. Tamil Nadu Bishops' Council nung tatong Tir, Rev. Dr Lawrence Pius-i, India nung Khristantemi shisaliok, healthcare aser lokti tenzüka ajanga linük yangerba nung tongti shilem agiogo; iba denji külemi Khristantemi yimjung aser tesünep ajungkettsür, ta ashi. Church of South India-isa Khristmas mapang state balala nung item tatalokba ajanga takoksa anguba Khristanem den tejashi lemsatöp. Arogoisa lokti tentettem, yimsü balala nung lenirtem aser sorkar ketdangsertem dang linük nung nütsüng ajema alirtem kümzüksü atema inyaktsü aser senso ajaki yimsü dak sendakba benjung ajak sadoksadoka mongtetsüsa inyaktsüla, ta ayongzük. December 25 nü Church of South India aser December 23 nü Catholic Bishops' Conference of India-i Khristmas mongpu nung India tesem balala nung Khristanem anema inyakba atema tebilemstsü akaba lemsatöpa liasü. Arogo nung lenirtemi, Delhi, Kerala, Uttarakhand, Odisha, Chhattisgarh, Madhya Pradesh, Haryana aser Rajasthan densema state balala nung Khristmas amonger tamangertemi timtem balala ajangshiogo; item tatalokbatem rongnung carol tena senzürtem amokmerenba, Khristmas benjung sübotsü raksatsüba, tekülem sentong agirtem amokmerenba aser tekülem sentong tagidak mapang nung timtem agütsüba densema lir, ta metetdaksü. CSI sangdong ajanga, "Tang tashi nungbo tang ama Khristanem anema inyakba

tatalokba aika mangjashii liasü, talisa Khristmas anogo aser Khristmas benjung nung tamangertem anema inyakba tatalokba ya tang teimba asütsü," ta metetdaksü. CSI-isa, "Tesünep nung Khristmas benjung amongertemi amokmeren jenti ajuruba ajanga nüburtem rongnung tetsübu proker," ta metetdaksü. Arogo nung lenirtemi, item ama inyaksangshi ajanga India temzüng kübok Arrla 25 anema inyaker, kechiyong iba Arrla ajanga peii melungba yimsü amanga beshitsü atema senso ajak nem temeden agütsür, ta metetdaksü. **BGEA-i Argentina nung 'Festival of Hope' ayongzüka agitsü** **January 16, 2026:** Billy Graham Evangelistic Association (BGEA)-i Argentina kübok Ushuaia nung 'Ushuaia Hope Festival' ayongzüka agitsü. Iba region nung tamangertem shilem ishika dang lir; tawa iba region nung nisung noklang aikati pei tamang jenjang aintsü atema training course ka renema agiogo. Ushuaia yimti ya Argentiba yimtiba Buenos Aires nungi kilometer 3,000 shi pilar lir, aser iba yimti ya alima nung 'south' tsütsü tatembanglaktiba nung aliba yimti lir, ibayongji iba yimti dang "The end of the world" taka ajar. BGEA-i Hope Festival ayongzüka akaba ajanga tanela asentenshi milak tulu jangrutsü, ta local Arogotem aser Tierra del Fuego province nung aliba Arogotemi imlar. Sayutsüngir Franklin Graham-i aniba Billy Graham Evangelistic Association (BGEA)-i Festival of Hope Ushuaia ya February ita nung agitsü, ta sangdongogo. Iba evangelistic sentong nung Laishiba nung ajemdaker

ANOGO ABEN TSÜNGREM DEN

Tasü itda meshi
Yabez-i Israel Tsüngrem dang jaa ashi, "Oh, nai ni maoajang aser kü littsü ulushidakjangma, aser ne ket kü den liangma, aser ni mejashitsüsa nai ni timtem nungi sotangma!" Aser pai kechi asüngdang Tsüngremi mela. 1 Putipuyang 4:10.
Temulung ajak agi bendanga agütsür tasü itda sarasademba nung Tsüngrem mulung achir aser pai moatsür. Yabez-i Tsüngrem dang temoatsü, tawabangba aser teküzmükba meshia sarasadem aser Tsüngremi moatsü. Tsüngrem dang meshitsüji Lai O-i sayur. Amanga meshiba ajanga Tsüngrem nungi telangzüba angur. Yabezi metet, memeshi nungbo mangutsü anungji pai temoatsü meshi. Yabez ama marendaki meshitsü nüngdaker. Pai littsü ulushitsü asoshi sarasadem, kechiyong littsü sadema alidak kiset shiruru chiyimdak peria angur. Tsüngrem teka adentsü asoshi sarasadem kechiyong yangji teküzmükba lir. Timtem nungi kümzüksü asüngdang kechiyong timtem ajanga Tsüngrem nungi melamela atsünga aor. Yabezi Tsüngrem dang kechisa asüngdang ajak Tsüngremi moatsü aser pa azükaru. Meshiang, aser aji nenok nem agütsütsü, bushiang aser nenoki angutsü, akoshiang, aser aji nenok nem lapoktsütsü. Mathi 7:7. **SARASADEM** Temoatsüba Tsüngrem, ne dang marendaki amanga meshitsü yariangma. Amen

sayutsüngitsü, tajungshi o jembitsü aser kentenmenü sentongtem alitsü. Hope Festival dak sendakba nung tamangertem noklang aikati Christian Life and Witness Course (CLWC) renemogo; iba course kübok pei nüburtem den pei tamang lemsateptsü aser ajungshitsü tesayuba agüja liasü, ta BGEA-i metetdaksü. Iba region nung aliba pastor temi, tang nübur aikati pei tanela jenjang bushiba ya odangbo masü ta bilema asentenshi milak jangrutsü imlar. Sayutsüngir Franklin Graham-i Argentina semdangtsü ta sangdongba sülen pastor Fabijn Rotenberg aser pastor Javier Campero na linük yimtiba, Buenos Aires-i oa Hope Festival ji Ushuaia nung ayongzüka agidaktsüner, ta mepishia liasü. Iba yimti nung Hope Festival ayongzüka akatsü jangjaba sülen yimti nung Arogo lenirtemi Christian Life and Witness Course (CLWC) training course ayongzüka agiogo. Nisung 2000-i iba course renemogo. Iba course ayongzüka katsüba ajanga tangbo Tenla kitem nung nisung sünga adenshir aser karbo kima amentsüsa akümer. Iba course agirtemisa Hope Festival nung adentsü atema kiyongertem aser kinüngertem ajungshir. Pastor Campero-i, iba festival atema renemshia pei tamang lemsatöpba den sarasadem sentongtem agir; iba festival agitsü aliba ajanga tamangertema aikati tanela jenjang bushi tenzükogo, ta metetdaksü. Paisa, "Onoki teimla tulu nung anogotem süidaktsür, longjemer aser Tsüngrem dak tamang akar," ta metetdaksü. Ushuaia yimti nung nütsüng 100,000 shi dang lir, ajisüaka iba nungjagi nütsüng shilem 10 shi dang Yisu Khrista den tesendaktep lir. Pastor tem aser Khristan lenirtemi iba festival akaba ajanga yimti nung dang masü saka region tesem ajaklen asentenshi milak jangrutsü imlar. Festival of Hope Ushuaia ayongzüka akaba ajanga Arogo nungi pilar alirtema aika tanaben Arogo dangi meyiptsü imlar aser mamangertema aikati Khrista agizüksü imlar.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tsütor

(adj) tera agi matong (a little short)


* Merangba sepai aitsü atema tar tera tsütor liasü.

Tsütsü

(v) eleni, elenji (towards, this or that side)

* Anüdok tsütsü alir yakta saker.

OLONG PAITEP # 7386



TIPIEN

3. Ola madokteti tsübuset - (6)
5. Balaka - (5)
7. Yim dak tatar tazungtem - (5)
8. Kenyongi memerük - (5)
10. Temang meta - (7)
11. Sensamasatsü - (5)
14. MLA - (5)
16. Tzü aketba süngjang - (5)
17. Süng nungi agitetba teküp - (6)

LANGTSÜNGLEN

1. Tepini aluba lenmang - (3)
2. Shi tamajung - (4)
3. Tsüngsem tajung ka - (4)
4. KI atema wazükba ali - (6)
6. Tenük makok - (5)
9. Tenük telen majung - (5)
10. Sen apua aliba - (6)
12. Kecha memetet - (4)
13. Taneb - (4)
15. Kidongren - (3)

OLONG PAITEP # 7385 TELANGZÜBA

TIPIEN :

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüksü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER MA



Iran nungi arishi küm 6 tain Hana Rezaei-i Guinness World Records ka yangluteta lir aser iba ya "longest time to spin a spinning top (Under 16s) - 36.55 seconds" atema lir. May 31, 2025 nü Hana küm 6 ajungba anogo nung iba naroküm nguteta liasü.

GSMC-i PM Modi den Garo Hills nung tebilemtsü lemsatöp



Shillong, January 16, 2026

(Agencies): Meghalaya nung Garoland State Movement Committee (GSMC)-i Prime Minister Narendra Modi dang Garo Hills region nung Bangladesh nungi ozüing alema arurtemi "humanitarian & constitutional crisis" tuluka bentsür aruogo ta shidi ka zülü.

GSMC-i Meghalaya lemsatsü atema noktaker aser tawa lisopur lanur Dilseng M. Sangma tepsetba ajanga iba tebilemtsü sayur ta parnoki ashi.

Bangladesh aser Assam nungi arur telok kati pa amak aser iba ajanga northeast nung lisopurtemi tayongzükba jenti ajuruba kuli agütsür ta GSMC-isa metetdaksü.

Dilseng tepsetba ajanga sorkar ketdangsübaren, ozüingren aser Constitution nung Sixth Schedule kübok lisopur

temetemten kümzüka meyutetba sayur ta parnoki Prime Minister dang shidi nung shia lir.

"Northeastern region nung aser talisa Sixth Schedule kübok kümzüka aliba tesemtem nung ozüing alema nisung aika arua alir. Aadhaar aser voter IDs dena identity documents tiyazü amshia tashiyim agi lisopur ali atsünga agiba osangtem lir" ta GSMC general secretary Tony Tojrang B. Marak-i ashi.

Ibala inyakyim ajanga lisopur ali temetentem nung dang masü saka national security aser constitutional safeguards nunga lendong bentsür arutsü ta pai ashi.

Ibala ozüing alema inyaksangshiba nung foreign mesüra organised networks lir asü mali bushisüngdang südaksütsüla ta GSMC-isa takhangba agütsü.

Meghalaya sorkar aser Garo Hills Autonomous District Council ajanga ozüing alema aruba, ali atsünga agiba aser iba dak sendakba mapatem azüoktsüsa mapa meinyaker ta parnokisa tai tongloksüogo.

Parnoki Prime Minister dang ozüing alema arurtem maitüsü jangjatsü aser meyipa yoktsü, ozüing alema agütsüba land & revenue documents meyipa agitsü, taila identity papers agütsürtem aputsü aser ibala mapa inyakba ketdangsürtem merenshitsü takhangba agütsüogo.

Ozüing alema lung shibelener telok kati January 10 nü West Garo Hills nung Dilseng Sangma tepsetba ajanga tensa mejungi aküm saka Chief Minister Conrad K. Sangma-i mepishiba sülen süngjemogo.

Karbi Anglong-Nagaon arrtsü atema commission ka tentet

Guwahati, January 16, 2026

(Agencies): Assam sorkari Karbi Anglong aser Nagaon district tem kübok yimtsüing 27 inclusion aser exclusion atsütepba asadanga reprangtsü atema high-level commission ka tentetogo.

Iba commission ya Additional Chief Secretary, Government of Assam Dr Ballepu Kalyan Chakravarthy, IAS lenisüba kübok asütsü aser Karbi Anglong Autonomous Council (KAAC) sasap aser temeket nung aliba

yimtsüingtemi ken o tem benokba meyipa reprangshitsü.

Iba commission ajanga boundary demarcation, jurisdictional authority aser Sixth Schedule-related protections indang reprangshimtsü.

Karbi Anglong nung alirtemi parnok district sasap nung item yimtsüingtem dendaksütsü takhangba agütsür aser iba ajanga parnok Sixth Schedule kübok züingsemstsü.

Iba commission-i kobi melii

public consultations tenzüka agitsü ta Chief Minister Himanta Biswa Sarma-i metetdaksüogo.

Parnoki yim daklirtem, district administrations aser Karbi Anglong, Nagaon o temeket aliba MLA tem den ajuruteptsü ta pai ashi.

Iba commission nung Karbi Anglong, West Karbi Anglong, Nagaon, Hojai, Morigaon aser Dima Hasao nungi District Commissioner tem züingsemstsü.

Manipur nung ali acre 110 shi ka nung poppy alutem raksatsü



Imphal, January 16, 2026

(Agencies): Manipur nung security forces-i arrtsülen aliba district asem nung poppy alu tulu ka raksatsüogo.

Parnoki ali acre 110 shi ka nung poppy alu raksatsü aser iba ajanga Rs 3.3 crore alang opium yangluttetsü liasü ta ashir.

Iba mapa ya Manipur sorkari tenzüka "War on Drugs"

campaign nung shilem ka lir.

January 14, 2026 nü security forces, forest department aser executive magistrate adenba telok kati Kamjong district kübok Lungphu Hill Range nung ali acre 15 shi ka nung poppy alu raksatsü.

Ano, January 13, 2026 nü Senapati district kübok Sadim Hills Range nunga ali acre 30 shi ka nung poppy tema aliba raksaja

liasü.

Kasa anogo nungsa Chandel district kübok Govok Hill Range nunga ali acre 65 shi ka nung poppy alutem raksatsüogo.

Ali acre 1 nung poppy ajanga legal Indian market nung raw opium seret 25 shi yangluteter aser iba ya government-fixed rates nung Rs 45,000 nungi Rs 87,500 agi ayoker.

Taoba South Korea tir Yoon küm 5 tepuokdak ayutsü



Seoul, Aenjeti/January 16 (Agencies): South Korea nung okadak kati taoba tir Yoon Suk Yeol, 2024 küm December ita martial law sangdongba atema aitsür aliba nung aibelena aliba ngutetba sülen küm pongu tepuokdak ayutsü obendang agütsüogo.

Yoon ya Hokolbarnü aibelena aliba nguteogo, kong martial law sangdongba dak sendakba nung arrest warrant ka benoka inyaksü atema ketdangsürtem nem tetsüdahtsü agütsüba aser official kuli kakettem yanglushiba aser martial law

benoktsü atema temzüng özüng kübok tinyaktsü tim benoka minyakba densema lir.

Seoul indang Central District Court nung Hokolbarnü obendanger Baek Dae-hyun-i ashiba agi, Yoon-i Constitution aser rule of law sülen tashi anga manidak.

"Tangar ajak dang nungi alia tir ka ama Constitution sülen anidaktsü aser rule of law benschitsü nüngdaka liaka defendant-i Constitution anema-ang inyaksangshia liasü," ta Baek-i ashi.

Iba obendang agütsüba anema Yoon-i anogo tenet

tsüingda ken o benoktettsü, ta obendanger yagisa ashi.

Obendangdak kima osangbenertem den sensaksemba mapang Yoon okatsür Yoo Jung-hwa ashiba agi, taoba tir-i iba obendang anema temepishiba ka agütsütsü.

"Yimden yimsüsüba dak ajemdaker iba telemtetba agütsüba atema onoki sasaba lemasteper," ta lai ashi.

Martial law benoktsü merangba atema Yoon atema ken o balala benoker aliba nung iba ken o ya mezüngbuba lir. Martial law ya ghonda trok atema benok aser iba ajanga South Korea ajunga anokshija liasü.

South Korea yimtiba Seoul nungi Al Jazeera osangbener Jack Barton-i ashiba agi, Yoon pusemertem Hokolbarnü okadak kima adenshi aser iba obendang agütsüba atema parnok mepelaba ayima liasü.

Martial law benokba sülen Yoon ya impeach asü, apu aser tir ama mapa nungi agina liasü. Ajisüaka Yoon-i ashiba agi, pai özüng kecha meraksa.

Saudi-i teyari agütsüba Yemen sorkari PM tasen shim

Sanaa, Aenjeti/January 16 (Agencies): Yemen nung Saudi-i teyari agütsüba presidential leadership council-i Ato Kilonser Salem bin Breik-i pa mapa nungi anentsü atema shiti benokba agizük aser Minister Shaya Mohsin al-Zindani shimogo, ta state news agency Saba samgdong ka ajanga metetdaksü.

Bin Breik-i pa mapa nungi anentsü atema mepishiba shiti ya formally benok, koba council-i agizük aser iba sülen taruba cabinet tentettsü atema Zindani shimogo, ta Saba-i Brehostibarnü metetdaksü.

Yemen nung ita ishika tsüingda Saudi Arabia aser United Arab Emirates na mangatetep adoka arudar.

Southern Yemeni separatist telok, Southern Transitional Council- koba Saudi Arabia-i ashiba agi UAE-i nongita yarir-iba telok yagi December ita Yemen anütoklen aser anütoktiplen tesem aika atsünyonga ao aser Saudi arrtsü tonganüa oa liasü, koba Saudi-i ashiba agi, par linük security atema amokmeren ka lir.

Iba sülen Saudi-i teyari agütsüba sepaitemi item tesemtem timba meyipa agiogo.

Yimden yimsüsüba nungi tenzüker totzü output amala ken o balala nung tibilemba balala asüba ajanga Gulf nung tashi taittiba linük ana ya mangatetep adoka arudar.

Saudi Arabia aser UAE na taoba mapang Yemen nung civil war mapang Iran-i teyari agütsüba Houthis telok anema raraogo. Iba rara ajanga alima nung humanitarian crises

tamajungtiba tenzükdakja liasü.

Kasa mapang nung Yemen nung züngsem ti agi kümtetba presidential body-i Brehostibarnü UAE nung southern separatist ka magizük aser iba ajanga linük nung telemtetba balala agiba lokti tentet ya Saudi Arabia tazüokba küboki aiddaktsüogo.

"Presidential Leadership Council nungi Faraj Salmeen Al-Bahsani indang membership thitsütsü asoshi telemtetba agiogo," ta Saudi-i teyari agütsüba lokti tentet yagi ashi.

Bahsani ya STC indang tatong tir lir, shiba UAE nung tang temang anepaludar aser pa ya totzü aika adokba Hadramout province indang governor liasü. Hadramout ya Yemen nung province tulutiba aser separatists temi atsüngba province ana rongnung ka lir.

Iba ita tetenzüklen STC lenir Aidarous al-Zubaidi, shiba PLC züngsem ka liasü, pa-a tashioktsüba maparen balala asoshi aija mapa nungi anentsüba sülen UAE-i jena oa liasü.

Council-i bangzünga ayuba nung, Bahsani-i aibelen menaba aika shia lir, kong Zubaidi aser STC-i sorkar atsüngtsü asoshi pai pusema densema lir.

Deobarnü Bahsani-i AFP news agency den interview ka nung shilemagi, kong pai ashiba agi, southern separatists densema southern force temi PLC mendenbubai anogo ka jelia sangdongba ama Saudi-i aniba telok kübok longjemtsü mulungtsü.

Paisa, Saudi Arabia, kong Yemen indang southern faction tem atema sensaksem

ayongzüka agidar, parnok dang sensaksem nung shilem agirtem par linük adena or ajurutepa sensaksemtsü asoshi temelaba agütsütsü mepeshia metetdaksüogo.

"Ni Saudi Arabia dang south nung alirtem Saudi Arabia adena or ajurutepa sensaksemtsü asoshi maongka agütsütsü mepeshir, kechiyong Riyadh nung senden menra senden nung shilem agirtem tali nongshitsü," ta pai AFP dang ashi.

Taoba hopta separatist tem rongnungi tongtibang lenirtemi ashiba agi, parnok Riyadh nungi iba telok loksatsüogo, kong parnok sensaksemtsü atema oa liasü. STC-i ashiba agi, iba telemtetba ya tali nongshiba ajanga agi. Parnokisa iba team sota ayuba atema Saudi Arabia agija liasü.

Brehostibarnü PLC-i Zubaidi aser Bahsani na melentsü atema Saudi pusemba nisung ana shimogo.

Toba mapang defence minister Lieutenant General Mahmoud al-Subaihi aser PLC chairman dangi security & defence adviser Rashad al-Alimi na shimogo.

Salem al-Khanbashi ya Hadramout indang governor lir.

Brehostibarnü Saudi Arabia-i Yemen nem public servants aser servicemen tem nem ita ana atema itasen agütsütsü asoshi USD million 90 agütsüogo, ta Yemen Ato Kilonser-i ashi. Saudi-i humanitarian project balala atema USD billion 0.5 agütsütsü nangzüka sülen PM-i iba osang sangdonga liasü.

MOLUNGNEN O



ASO :
14/4/1993

ASÜ :
28/12/2025

Onoki kodanga amatsü makokba Asür **Wb. Sangpusungkum** (Longsa), ajungbena akümüli tembangba anogo nungi özü asüko mapang piyong lokti tentet balala, kija kibong aser kiyong-kinar shirnokisa nübu, rongsen, shisatsü aser sarasadem nung yaritepogo, nenok ajak dang kangasa pelaba lemsateper.

Nenok temeim mapa tulu asoshi Tsüngremi talubusa moajangma ta özü sarasadem.

Temeim Tebu, Chirnur aser Kinungertem

MOLUNGNEN O



01.08.1928 ~ 08.01.2026

Tekümdang temerük arishir nubensor tebu tsürabur **Wb. Takoraba Longchar** (Chuchuyimlang) akümüli wadang tempangba mapangtem nung özü mulung zürep tia aria bilemtsüa shirnokisa sarasadem, temeim mapa aser nüngdakba ajak nung onok toudhi mesüdahtsü nungita yaritepogo ajak dang onok shisatsü aser mulongsentsü rangpeni arokaroka pelaba lemsateper. Tsüngremer taochi teka talangi nenok lenla ajak nung Talubosa moatsütsü onok tamang sarasadem.

~ Temeim Kinungertem.

Putin-i Netanyahu aser Iran tir den sensak asem



Moscow, Aenjeti/January 16 (Agencies): Russia tir Vladimir Putin aser Israel Ato Kilonser Benjamin Netanyahu na Hokolbarnü phone ajanga Middle East aser Iran nung tensa mejungi aliba indang sensaksemogo.

Kremlin sangdong ka ajanga ashiba agi, Iran dak sendakba nung ken o mebenteti aliba bentettsü atema Russia-i teyari agütsütsü mulunga aliba Putin-i Netanyahu nem metetdaksüogo. Paisa, Israel nunger lenir dang ya paibo sensaksem ajanga ken o balala bentettsü pusemer ta shiogo.

Iba sülen Putin-i ano Iran tir Masoud Pezeshkian den phone ajanga sensaksemogo, ta Kremlin-isa metetdaksü. Kremlin otongdar Dmitry Peskov-i osangbenertem dang ashiba agi, Russia tir-i Middle East nung tensa mejungi aliba

süngjemdaksütsü asoshi maneni inyaksü.

Iran nung lenir Ayatollah Ali Khamenei-i aniba sorkar anema December 28 nü nungi longkak aita aliba mapang Putin-i phone ajanga tir den jembiogo. Oset nung jenjang tali akümba aser Iran indang currency kanga ajema akümba ajanga iba longkak aitba sentong ya tenzü, saka tangbo linük ajunga nung nüburtemi longkak ait tenzükogo. Osang ajanga ashiba agi tesem 280 nung nüburtemi longkak aitar.

Iran nunger ketdangsürtem i a rongsenketzüng nung timtem aliba ajanga longkak ait tenzüka ya mezüngbo agizüka liasü. Ajisüaka sorkar tali nongshiba sülen parnok tamendakdak melenshi. Taoba hopta tashi nungbo judiciary tekolakbai, Islamic Republic, tsükchir nem teyari agütsürtem dang tai matoktsü ta shiogo, aser tanga tongtibang ketdangsürtem i a bendangertem teyari agütsüba kiralongrartem den rara indang jembiogo.

Activists temi ashiba agi iba lendong nung nisung 3,400 dak tema tepsetogo, ta US nung amendaker aliba Human Rights News Agency (HRNA)-i metetdaksü.

Bangladesh cricket mepetmesü nung lir: BCB-i director mapa nungi anentsüogo

Aenjeti/January 16, 2026

(Agencies): Bangladesh Cricket Board (BCB) director M Nazmul Islam Brehostibarnü mapang nungi anentsüogo. Pai finance committee tekolak mapa bener aliba dena toktsütsü. Cricket asayartemi takhangba agütsüba sülen pa mapa nungi anenja liasü.

"Tawa tatalokbatem lepareprangshiba sülen lokti tentet tejangraba apir BCB tiri Najmul Islam finance committee mendenbuba mapa nungi agintsü telemtetba agiogo," ta BCB sangdong ka ajanga metetdaksü.

"Cricket asayartem tejangraba kümzüka ayutsüji ajak dang tongtibangtiba lir ta BCB-i nenshir. Board kübok asayartem meraket wazüka ayutsü asoshi board bendanga agütsür lir," ta BCB-isa shisem.

Brehostibarnü Bangladesh Premier League (BPL) nung asaya 1 ako nungi tenzüksü liasü, saka Mirpur nung Sher-e-Bangla National Cricket Stadium nung asaya atema

team tem maruba sülen iba jenjang ya agia liasü.

Asayartemi Bangladesh Cricket Board (BCB) director M Nazmul Islam mapa nungi anentsütsü takhangba agüja liasü. Pai linük nungi cricket asayartem anema yimjak nung tashishitsü aketba o jembiba atema mapa nungi agintsü khangba liasü.

Islam mapa nungi manen tashi asaya kecha nunga shilem magitsü asayartemi amokmerena liasü.

Bangladesh team taruba ita T20 World Cup asayatsü atema India-i maotsü ta nenshia jembiba mapang Najmul-i, Bangladesh team iba asayamung nungi atsüngira asayartem nem taah agütsütsü aliba ken o zütoka toktsüba sülen iba mepetmesü tenzüka liasü.

Pai ashiba agi, asayartem nem taah magütsütsü.

"Bangladesh Cricket Board (world cup nung masayara) kecha makoksatsü, kechiyong asayartemang akoksatsü," ta

Najmul-i ashi. "2027 tashi onok revenue makoksatsü, kechiyong 2022 ICC financial senden nung iba ya latetatokogo. Tarutsü nung World Cup mesüra bilateral mesüra international asayamung dak kongshitsü akok, saka taküm World Cup dakbo mekongshitsü," ta pai ashi.

Najmul-isa, team WC nung masayara asayartem nem taah agütsütsüba ken o magizük. "Kechiba taa agütsütsü? parnok tanga tesem kari or kecha minyaktetra onoki taka crore aika entokba ya meyipa meshitsü asü masü?" ta pai ashi. Paisa, board medeni asayartem liyonga aotsü tasak asütsü ta ashi.

BCCI-i Mustafizur Rahman IPL nung masayadaksütsü telemtetba agiba sülen BCB-i India-i oa World Cup asayatsü memulungi kümogo. Kasa mapang nung International Cricket Council-ia Bangladesh nunger asaya India nung dang asayadaksüner.

Mia Blichfeldt-i India Open tanaben aitsü

Aenjeti/January 16, 2026

(Agencies): Denmark tsür Mia Blichfeldt-i Instagram ajanga tang asaya aliba India Open nung condition majungba indang anogo asem tsüngda anaben aitsüogo. Lai ashiba agi, India nung anogo ishika amungba ya lai imlaba dang nungi tasakba liasü.

Blichfeldt-i Indira Gandhi Stadium nung venue tasenbuba nung asayatsü condition majungba indang aitsüba sülen nisung aikati pei tebilemba lemsatepba sensaksema aruogo. Lai ashiba agi, hall melenshiba ajanga asayartem atema parnok temeket memerekba kecha balaka memelenshi.

Brehostibarnü tetsür kija asaya nung seventh-seed Ratchanok Intanon straight game nung makokba sülen Blichfeldt ya Hokolbarnü India toktsür ao, saka lai India Open ayongertem aitsüang oa liasü.

"India nung taoba anogo ishika kanga tasak liasü, koba ni imlaba dang nungi tasakba liasü. Ni tekelok shisatsü renemer aru, saka onok temeket ya agizüksü makok

aser kanga dang unprofessional," ta Blichfeldt-i Instagram nung zülutsü.

"Onok idaki court telung aser tema nung asayatsü aser onok terenemshiba dak rangloker inyaksü aru. Tia maka iba amala tia tensa nung tetoktepba dak dang rangloker inyaka tajungtiba asayatsü tasak lir," ta Blichfeldt-i ashi.

"Asayaba tesem nung conditions agi ajak tezü adanger. Mezüngbo odang sentonga toktsütsü meranger saka tatem nungbo iba ya kecha temenenetsü maket aser asayartem atema shitak masü," ta laisa shisem.

Blichfeldt-isa, practice court nung ozü scü tsüa aliba indang noksa lemsatep.

Badminton Association of India-i August ita World Championships asayatsü temulungdang yur taküm India Open Super 750 ya KD Jadhav hall nungi Indira Gandhi Indoor Stadium-i belener ao.

Blichfeldt-i taoba mapang ashiba agi, asayaba tesem melenshiba ajanga condition tajungba akümsü ta bilema liasü saka kecha memelenshi.

India tsür Manisha Kalyan lianza Lima Femenino nung denogo



Aenjeti/January 16, 2026

(Agencies): Europe nung küm asem asayaba sülen India tsür football asayar Manisha Kalyan-i South America-i aotsü.

Peruvian champions Alianza Lima Femenino-i, India tsürla ya Greek club PAOK FC nungi alizükba sangdongogo. League pezüben koker aliba team yagi ashiba agi, arishi küm 24 tain asayar yagi season tasenba nung team attacking unit tashi itshidaksütsü.

"Kalyan-i club aser national team jenjang nung kanga junga asayaogo," ta club sangdong ajanga metetdaksü.

European football nung temaba jenjang nung asayaba sülen Manisha Lima-i aotsü. La

taoba mapang Greece nung PAOK FC nungi asaya, kong pai asaya 23 nung goal ti idakja liasü. Iba masüdag la Cyprus nung Apollon Ladies FC nungi asaya aser iba mapang lai asaya 36 nung goal 14 idaksü aser India tsürtem rongnungi UEFA Women's Champions League asayaba mezüngbuba asayar aküm.

Manisha atema Alianza Lima ya la indang career nung bendanger club tasembuba asütsü. La professional asaya India nung Sethu FC aser Gokulam Kerala nungi asaya-a tenzüker aser iba sülen 2022 küm bendangleni ao.

League balala nung tajangshiba bener aliba ajanga Manisha-i midfield aser attack

nung Alianza Lima Femenino nem teyari agütsütsü imlar.

Manisha ya India tsürtem rongnungi football asaya nung takok tajungtiba anguba asayar ka lir aser la India team nungi teti asayar. Lai Sethu FC nungi kanga junga asaya-a Indian Women's League akokba sülen la nüngtugu aküm aser iba sülen Gokulam Kerala nung la jenjang yanglushia liasü.

Manisha-i AFC Women's Asian Cup densema tongtibang nung India tenüng nungi asayaogo. 2022 la Apollon Ladies FC-i aoba ya Indian football asoshi alizüng tasen ka tongtetba liasü, kechiyong la iba club nungi Champions League asaya liasü.

FC Goa Squad-i taah ajemer agitsü mulunga agizükogo

Aenjeti/January 16, 2026

(Agencies): Captain Sandesh Jhingan densema FC Goa senior team-i taah ajemer agitsü mulunga agizükogo. Linük nung football season menomeyangba ajanga senotsü nung tetsükdaksü adokba sülen tang team-i iba telemtetba agiogo. Indian Super League ya yimya agi November ita tenzüker saka taruba season February nungiang tenzüksü.

Asayartem dang masü saka senior team support staff temia taah ajema agitsü mulunga agizükogo.

FC Goa-i Brehostibar aonung X ajanga ashiba agi, parnoki asayar aser staff tem den tetsükdaksü balala aliba indang kanga sadoka sensakemogo, koba temela masü asü.

"India nunger football asayartem atema tia tensa mejangjai aliba mapang ozü club-i tetsükdaksü balala ajangshiba atema ochishia sensaksemogo. Senden nung telemtetba tajung agitetba agi onok kanga nema adanger," ta club sangdong ajanga metetdaksü.

"Onok indang First Team

nung asayartem aser Technical Staff temi club nongittsü shim aser parnok taah ajemer agitsü mulunga agizükogo," ta kasa sangdong ajanga metetdaksü.

AIFF Super Cup akokba team yagi ashiba agi, iba inyakyim agi parnok kanga ajemaludaksür aser team-i telongjem aser bendanga agütsüba sayuba atema kanga pelar.

FC Goa nung India nunger football asaya Udanta Singh aser Boris Singh nungera densema lir.

Iba ita tetenzüklen Bengaluru FC kibur Parth Jindal-i, ISL menoa tenzüka ajanga club tem senotsü nung timtemba mapang asayartem dang atsüanem akatsü mepeshia metetdaksüogo, aser ashiba agi, parnoki teyari magütsüra team inyaksangshi mesütetti akümsü.

Jindal-i koba lenla nung atsüanem akatsüla iba indang mejeta mashi, saka iba ya taruba season atema itasen ajemer agitsüba dak sendaka alitsü ta bilemer. Team nung taoba India captain Sunil Chhetri aser goalkeeper Gurpreet Singh Sandhu nata densema lir.

BILEMDANGANG

**Temeim mapa inyaknera
ola madoki inyakang."**